

武
經
總
要



欽定四庫全書

武經總要前集卷十八下

宋

曾公亮等

撰

邊防

西蕃地界

夏州漢朔方郡後魏置夏州深在沙漠之地唐開元中
為朔方軍大總管兼安北都護唐末拓拔思恭鎮
是州討黃巢有功賜姓李氏世有銀夏綏宥靜五

州之地五代李仁福彞超繼領節鉞號定難軍本朝太平興國中繼捧來朝願納土疆得州首豪二百七十八部族五萬帳復為王土其弟繼遷時十七歲不樂內徙嘯聚亡命侵擾邊境淳化中詔廢毀舊城其州兵徙相州置營仍曰夏州遷居民於綏銀州分官地給之咸平末繼遷死景德中子德明歛塞內附朝廷假本道節制德明死子元昊康定初復叛遂封夏國王以綏懷之今有夏銀綏宥

靈會鹽蘭勝涼甘肅十二州地東銀州三百餘里
西鹽州三百里南鹽州三百八十里北蕃界東南
綏州四百里西南慶州五百九十里西北豐州九
百里東北勝州九百里

鎮砦二

洪門鎮 本夏州地唐邠寧節度張獻甫築洪門鎮城
置兵以防蕃寇本朝雍熙中廢夏州其地今為洪

州

石堡鎮 本延州西邊鎮塞也至道中陷于夏今偽號

為龍州

賀蘭山 東至懷鎮六十里涇陽圖經曰賀蘭山在邑

西九十三里

天都山 按關右隴西圖記並無此山今西夏自為天

都山在鎮戎軍西北百五十里土地寬平西南有

路入渭州山外德順軍四砦界

瓦川會 東至鎮戎軍易藏山界西入蘭州界皆山路

南至明堂州北至會州界皆川谷路

天麻川 東北控龍谷路入靜邊砦西至馬啣山南至

合龍谷路北至瓦川會皆川路

銀州銀川郡漢屬西河郡為圜陽縣地以其在圜水之陰

也五代以來為夏州屬郡夏州廢毀遷居民於延

石州今陷于夏東石州界一百六十里西夏州界

二百里南綏州界六十里北麟州界三百里

綏州上郡秦所置西魏為綏州西漢六郡良家子東漢

十二郡騎士其一綏州唐屬朔方節度城在延州
東北無定河川本朝太平興國中李繼遷叛河右
俶擾以高文岷知州事繼遷攻擊不已因徙文岷
洎居民于石州廢毀其城咸平初言事者請城綏
州屯兵積穀以遏党項言利害者相半遣工部侍
郎錢若水馳往規度既而若水上言綏州頃為內
地民富登集尚須旁郡轉餉自賜趙保忠以來人
戶凋殘今若城之須廣屯戎兵倍於往日芻糧之

給全仰河東地隔黃河大小鐵碣二山城下有無
定河緩急用兵輸運艱阻即罷其役德明既歛附
上言乞綏州土田隸當道詔以誓表令邊臣詳定
附之其地東至石州一百三十里一說自石州孟
門渡河一百五里至綏州西夏州四百里南延州
三百五十里北銀州一百六十里

河二

浦洛河 東南五十里至清遠軍

無定河

宥州寧朔郡即漢三封縣之地自河曲靈夏有蕃戎部落後周武帝乃立胡州以統之唐天寶中改寧朔郡後寄理于經畧軍以地形居中可總統蕃部北以應接天德南為夏州之援元和十五年復置宥州于長澤縣隸夏綏銀節度刺史兼管神策軍本朝太平興國中李繼捧納國復為王土自夏州廢毀因陷于賊東夏州界六十里西鹽州界二百里

保安軍界約百里北夏州界約百五十里

靈州靈武郡唐之為回樂峯也自後魏置靈州初在河
北大統六年築城即今城是也唐開元中邊境置
節度以遏四夷以州為朔方節度理所管兵六萬
四千七百人捍禦北邊經統略安豐定安西受降
城安北都護振武等七軍內經略軍治在城內肅
宗即升都督府本朝至道初陽瓊為部署道黃河
溉民田數千頃戶四千餘課利四十五萬貫咸平

中陷于賊河外舊有五鎮今夏國偽升為州按唐
史元載獻議以靈武城為之勢形開元中朔方節
度張議往巡五城處置兵馬既北地東鹽州三百
里西涼州九百里南原州五百六十里東北豐州
九百里

鎮砦九

保靜鎮 本河外鎮咸平中陷今為偽靜州本鎮舊管
蕃部六族

臨河鎮 城鎮舊管蕃部三族置巡檢使以酋長為之
懷遠鎮 本河外縣城西至賀蘭山六十里咸平中陷
今為偽興州舊管鹽池三管蕃部七族置巡檢使
七員以本族酋長為之有水田菓園本赫連勃勃
菓園置堰分河水溉田號為塞北江南即此地

定遠鎮 唐削朔方節度下定遠一軍七千餘人在北
城南至懷遠鎮一百里西賀蘭山六里西南至二
百里本朝至道中建為威遠軍咸平中陷今為偽

定州其城則唐光天中朔方總管郭元振以西域
援潤豐安勢孤中間千里無城郭烽堠故置百募
城官建五千五百人鎮守為行軍計集之所後信
安郡王瑋又築羊馬城幅員十四里國初管蕃部
四族以酋長為巡檢使

靈武鎮 外河鎮也南渡河至靈武州五十里東保靜
鎮四十里西賀蘭山六十里北懷遠鎮七十里咸
平中陷今為偽順州以上五鎮自咸平中以前以

靈州都監兼五原鎮都巡檢使主之

豐安軍 唐屯田二十萬以上並河外六鎮也天寶末

魏少游為六城水運使杜鴻漸為朔方留後度支

使副率兵白草鎮迎詣肅宗言朔方天下勁兵靈

武州用武之地工倉儲庫物之數

艾山舊渠 後魏刁雍為骨律鎮將上表請開富平西

三十里艾山舊渠南北二十六里東西四十里鑿

以通河自禹舊跡兩岸作溉田大渠廣十步以河

水溉公私田四萬頃人獲其利

回樂峰 置縣在州城開元初置東臯蘭州皆九姓突

厥部落

温地 唐神龍年置縣側有鹽池唐洎五代節度使兼

領温池榷鹽事開元初置燕然燭龍二州寄治温

州池界並九姓突厥部落

鹽州原部唐都督府中元中城為吐蕃所毀塞外無堡
障犬戎入寇復加板築既成之後邊患息然迄德

宗匈奴不敢犯塞今陷東綏州六百里西會州八
百里南慶州二百五十里北宥州一百四十里東
延州五百三十里東北夏州三百里西南原州七
百里西北靈州三百里其地有曰池南北九十里
舊蕃戎之地有以其地有鹽池置城以護之唐曰
白池縣又名井城葭蘆澤貞元中度支使兼靈鹽
等州池井榷監使本朝景德中趙明德乞入青鹽
交易不允